

**EDUARD PIETERS TA CONFRONTA CRISIS
DI SUSHI CU UN REALIDAD INCOMODO:
“ARUBA NO TA FALTA DI
LEY, ARUBA TA FALTA DI
HANDHAVING!”**



WWW.SOLODIPUEBLO.COM



SOLODIPUEBLO@GMAIL.COM

DIA 22 DI MEI CORTE LO DICTA SENTENCIA DEN CASO DI STEPS BIKE VS GOBIERNO



54 LUNA DI PRISON EXIGI PA HOMBER CU A DROGA Y VIOLA MUCHA MUHER DI 15 AÑA



HUNGADORNAN DI CURACAO KIER DICK ADVOCAAT BEK COMO ENTRENADOR

COLILARGO: E RATON SILVESTRE TRAS DI E BROTE DI VIRUS ANDES NA CHILE Y ARGENTINA

E raton conoci como colilargo (*Oligoryzomys longicaudatus*) ta den foco di atencion internacional despues di a wordo identifica como e principal transmisor di e sepa Andes. E variante aki di hantavirus ta responsabel p'e brote recién riba e crucero di luho MV Hondius, caminda ya a confirma varios caso y persona cu a perde nan bida.



E animal chikito aki, cu ta pisa apenas 30 gram y tin un rabo cu por midi dos biaha e largo di su curpa, ta biba principalmente den e boskenan di Chile y e sur di Argentina. Segun experto André Rubio di Universidad di Chile, e colilargo ta un especie nativo protegi cu ta cumpli un funcion ecologico importante. Sinembargo, entre 5% pa 10% di e ratonnan aki ta carga e virus, un cifra cu por aumenta te cu 20% ora tin un crecimiento explosivo di nan poblacion.

E contagio pa humano ta tuma luga ora e persona hala aire contaminada

cu particula di orina, scupi of sushi di e raton infecta. E sepa Andes ta particularmente peligroso pasobra e ta e unico cu por wordo transmiti di persona pa persona. Autoridadnan ta investigando e origen di e contagio riba e crucero, cu e hipotesis principal cu e prome victimanan a wordo exponi na tera firme durante un biahe den e

region di Patagonia.

Rubio ta adverti cu e intervencion humano den naturalesa ta aumenta e riesgo di exposicion n'e virusnan aki. Pa preveni, ta recomenda pa semper ventila bon e cabañanan y bodeganan den zonanan rural, specialmente durante e lunanan di zomer ora e ratonnan ta busca cuminda cerca di caminda hende

ta biba.

Maske e situacion riba e crucero ta serio, expertonan ta pidi calma, splicando cu den aire liber e virus ta dura poco tempo y e raton aki normalmente no ta drenta den casnan asina facil manera e ratonnan comun.

AUNKE NO TA HAYA E MANTA DEN NOS AWA TERITORIAL, E TA PROTEHA PA NOS LEYNAN LOCAL



HUNGADORNAN DI CURACAO KIER DICK ADVOCAAT BEK COMO ENTRENADOR

WILLEMSTAD Medionan Hulandes a raporta cu miembronan di seleccion di Curacao a pidi presidente di FFK, Gilbert Martina, pa trece Dick Advocaat bek pa asumi e puesto di entrenador principal di Blue Wave.

Manera ya tabata conoci, Advocaat a laga su funcion na maart di e aña aki despues cu problema di salud di su yiu muher. Awor porta e situacion a mehora i e veterano director tecnico ta habri pa un posibel regreso.

Segun e hungadornan, nan ta prefera pa ta den Mundial bao direccion di Advocaat na lugar di Fred Rutten, ken a dirigi Curacao den e partido contra Australia luna pasa.



PROME MINISTER MIKE EMAN TA REPRESENTA REINO HULANDES NA COSTA RICA

Aruba den encuentro cu presidente electo di Costa Rica Laura Fernández Delgado

Durante su bishita oficial na Costa Rica, Prome Minister Mike Eman a comparti cu e agenda di encuentro ta bayendo di forma positivo, cu enfoka riba fortalece relacionnan bilateral y regional.

Un di e momentonan principal tabata encuentro cu presidente electo di Costa Rica, Laura Fernández Delgado, kende diabierna mainta lo ta instala oficialmente den cargo durante un ceremonia na Stadion

Nacional di San José. Durante e ceremonia di instalacion, Aruba ta representa Reino Hulandes, reafirmando e lasonan diplomatico entre e regionnan.

Segun e Prome Minister, e encuentro cu presidente electo a permiti un intercambio importante di idea riba cooperacion entre Costa Rica, Aruba y Reino Hulandes.

Eman a destaca cu e relacion entre e region tin potencial amplio, specialmente ora cu ta considera e posicion unico di Reino Hulandes.

“Nos ta trece un



perspectiva unico como Reino, cu presencia tanto den Europa como den Caribe y Latino America,” el a indica.

Segun e Prome Minister di Aruba, e dobel presencia

aki ta crea oportunidad pa estrecha e lasonan entre e paisnan y fortalece cooperacion den diferente ambito.

E bishita na Costa Rica ta forma parti di un esfuerzo

mas amplio pa posiciona Aruba dentro di dialogo regional, fomentando colaboracion y intercambio cu paisnan bisiña, den Centro y Sur America.



NoticiadiCorte

54 LUNA DI PRISON EXIGI PA HOMBER CU A DROGA Y VIOLA MUCHA MUHER DI 15 AÑA

ORANJESTAD – Awe mainta Corte di Husticia a trata e caso penal cu Ministerio Publico a cuminsa contra e homber Haitiano biba na Aruba, S. (32), kende ta wordo acusa di a droga y viola un mucha muher di 15 aña.

SOLO DI PUEBLO por a compronde cu Fiscal a exige 54 luna di prison pa e homber S., kende a pidi disculpa na e mama di e hoben cu tabata presente den sala di Corte.

ACUSACIONNAN

E acusacionnan cu Fiscal a presenta contra S. ta cu el a droga y viola un dama hoben M. (15) y a haci actonan immoral cu M. Esaki a sosode dia 27 Februari 2025.

SOSPECHOSO TA NENGA

Hues a bisa cu segun raport di Polis, S. a palabra cu dos otro hende, un homber S. y e dama hoben M. pa bay beach. Ta sospecha cu e dia ey anochi a sosode cosnan cu no ta permiti caminda S. a viola e mucha muher M. Hues a puntra S. kico a sosode. Segun S., e dia ey el a conoce e homber S. y e dama M. El a pidi e homber S. instagram di M. El a bisa cu e homber S. y e dama M. a huma marihuana na beach.

Hues a corta S. den su declaracion y a puntra, si S. tabatin relacion sexual cu e dama M. Segun S., el a baha e homber S. na cas y el a hiba M. El a bisa cu e dama M. a bisa cu e no kier bay cas awor. Nan a bay beach bek y a tene relacion. Segun S., e no a forza e dama M. haci nada. El a bisa cu ta e dama M. mes a haci movecion pa tin relacion sexual. Segun S., e dama M. a cuminsa yora y a bisa S. cu den pasado el a wordo abusa di un otro homber. Segun S., el a bisa M. pa bisa su mama of yama Polis. M. a bisa cu e no a bisa su mama. Despues di tabatin relacion sexual, el a hiba M. su cas.

VIOLACION DI MUCHA

Hues a bisa cu esey ta e banda di medaya di S. pero si evalua henter e caso, tin preguntanan! Hues a bisa cu dia 28 Februari 2025 marduga, M. tabata na Insam na San Nicolas bou influencia di droga hunto cu e homber S. Hues a mostra cu e homber S. a bisa cu otro cos a sosode. Segun M., nan a dun'e hopi bebida alcoholico y el a haya un

blackout. Despues di cu S. a baha e homber S. na su cas, S. a sigui duna M. alcohol y el a haya blackout. Ora el a spierta, el a ripara cu e tabata den un camber y S. para su dilanti. Segun M., el a cuminsa grita ora cu S. a mishi na su parti intimo.

Hues a sigui bisa cu na Insam M. a conta kico a sosode y investigacion medico ta muestra cu M. a wordo abusa y tabatin un herida na su pia. Segun M., el a sufri herida na pia ora cu e tabata lucha cu S.

SOSPECHOSO NO KIER PAPIA

Hues a remarca cu ta hopi straño cu S. ta bisa algo y e dama M. ta bisa otro cos. Segun S. loke M. a bisa no ta berdad. El a para riba cu tur cos a sosode voluntario. Hues a puntra S. pakico e tabata kier e Instagram di M. Hues tabata haci preguntanan skerpi na S. entre otro si e tabata haya M. bunita y si e tabata kier tin relacion cune.

Ta asina cu S. a bisa cu ta e homber S. tabata kier a bay beach. Hues a remarca cu S. no kier bisa nada. El a mostra cu e homber S. a bisa cu e tabata intermedia entre S. y M. Hues a sigui bisa cu e homber S. a declara cu el a bisa S. cu M. tin 15 aña. Apesar di esey, S. lo a insisti. Hues a mostra cu S. lo a manda mensahe pa M. cu e por ta un secreto entre nan dos. Na opinion di Hues, tur esaki ta muestra cu S. tabata kier tin relacion cu M.

Segun S., e no tabata kier tin relacion cu M. Hues a remarca cu ora M. a brasa S., S. no a bisa cu no, sino a tene relacion cu M. Hues a bisa cu e homber S. a bisa cu el a ripara cu S. tabata kier tin algo cu M. Ora el a baha na su cas, e tabata duna M. señal pa baha cun'e pero M. a keda den e auto. Mas o menos 12'or di anochi, S. a yama M. y a scucha M. ta yora. E ora ey M. a bis'e cu S. tabata kier penetr'e cu su dede. S. tabatin mal pensamiento cu esaki. Despues ta resulta cu M. a bay Insam y bisa cu el a wordo viola. Ta asina cu for 3 November 2025, S. ta encarcela.

SOSPECHOSO TA PIDI DISCULPA

Na dado momento S. a bisa Hues cu ta duel e hopi loke a sosode. El a pidi disculpa na e mama

di e mucha y na su señora. E señora y e mama di S. tabata yora den sala di Corte. Hues a bisa cu e caso aki ta hopi lamentable y ta un drama pa tanto e famia di M. y famia di S. Hues a bisa cu Reclasering a recomenda cu si ta duna castigo combina pa S. sigui un curso special riba abusa di mucha.


FISCAL TA EXIGI 54 LUNA DI PRISON

Fiscal a bisa Hues cu ta un hecho cu S. a tene relacion sexual cu M. E pregunta ta si aki tabatin forzamento y si M. a perde conocimiento. S. ta para riba cu e no a forza M. Fiscal a bisa cu M. a bisa cu e homber S. tabata dun'e bebida alcoholico cada rato. Despues ora a baha e homber S. na cas, S. a sigui dun'e bebida y el a haya un blackout. Ora el a spierta e tabata den un apartamento y a sinti dolor pasobra S. tabata penetr'e cu su dede. Segun M., el a lucha cu S. y a sufri un herida na su pia. Fiscal ta haya e declaracion di M. confiabel. El a bisa cu S. a admiti di tabatin relacion sexual cu M. Fiscal a mostra cu e homber S. a bisa cu S. a cumpra un boter di bebida fuerte pa nan bebe. Fiscal ta haya cu tin suficiente prueba di sosten. El a mostra tambe cu na Insam a haci investigacion cu ta muestra cu M. a wordo viola. Fiscal a mostra cu S. mes a bisa cu ora e tabatin relacion cu M., M. a cuminsa yora. Fiscal ta haya S. culpabel di violacion y actonan immoral. E ta haya cu S. a droga M. pa asina abusa di dje. Fiscal a remarca cu apesar cu e homber S. a bisa S. cu M. tin 15 aña, S. a planea pa duna M. bebida pa asina abusa di dje. Fiscal ta haya cu S. a tacha e integridad di M. Fiscal a exige 54 luna (4 aña y 6 luna) di prison di cual 6 luna ta condicional cu 3 aña di prueba.

ABOGADO

Mr. Kock a bisa Hues cu e caso ta di lamenta y cu S. a bisa cu ta duel e loke a sosode. E abogado a bisa cu ta solamente e famianan a keda afecta. El a bisa cu ta promer biaha S. ta cay den man di husticia. El a bisa cu e pareha di S. ta pasa momentonan hopi dificil pa mantene e yiunan. E pareha di S. no por a contene su mes mas y a sali for di sala di Corte. Hues a bisa cu e ta bay studia e caso y 29 Mei 2026 lo dicta sentencia.

METLIFE STADIUM TA CUMINSA PREPARACION PA FINAL DI MUNDIAL CU INSTALACION DI YERBA NATURAL



MetLife Stadium, cu lo fungi como sede pa e gran final di Copa Mundial,, a inicia su proceso di adaptacion. Esaki ta inclui instalacion di un yerba special caminda lo hunga ocho partido, incluyendo e final riba 19 di juli.

David Graham, hefe di terenonan di wega di FIFA, a splica cu e yerba selecciona ta di e tipo "Bermuda", ideal pa temponan calor. E yerba aki a wordo transporta for di North Carolina despues di a pasa den pruebanan cientifico na e Universidadnan di Tennessee y Michigan State pa garantisu su adaptacion na e clima local. Experiencia y cambio

E decision pa uza e tipo di yerba aki ta bin despues di critica fuerte ricibi durante e Mundial di Clubes di aña pasa, caminda hungado y entrenadornan no tabata satisfecho cu e estado di e canchanan. Segun representantenan di FIFA, e biaha aki e sedenan tin mas di un luna pa prepara

e tereno, a diferencia di e cinco dianan cu nan tabatin anteriormente.

Kalender di wega
E stadion, cu lo wordo yama oficialmente "Nueva York/Nueva Jersey Stadium" durante e torneo pa motibonan comercial, lo acoge e siguiente partidonan:

13 di juni: Brasil contra Maroco

16 di juni: Francia contra Senegal

22 di juni: Noruega contra Senegal

25 di juni: Ecuador contra Alemania


27 di juni: Panama contra Inglatera

Ademas di un partido di 16 final, un di 8 final y e gran final di 19 di juli.

Mas cu futbol

Cu un capacidad pa 82.500 fanatico, MetLife no solamente ta e cas

di e ekiponan di NFL, New York Giants y New York Jets, sino tambe un epicentro pa concierto. Despues di e Mundial, e stadion lo ricibi artistanan grandi manera BTS, Guns N' Roses, Bruno Mars, Ed Sheeran, Karol G y AC/DC durante e resto di e zomer



M.J.C TROMP NOTARIS

Santa Cruz 35 • Santa Cruz, Aruba
+297 585 3500 | +297 585 7900
info@notaristromp.com

Op **donderdag 4 juni 2026** des namiddag om 14.00 uur, zal in de vergaderzaal van de "Aruba Surfside Marina", L.G. Smith Boulevard 7, Oranjestad, Aruba, ten overstaan van notaris mr M.J.C. Tromp of haar plaatsvervanger, de executoriale verkoop, als bedoeld in artikel 3:268 van het Burgerlijk Wetboek van Aruba, bij opbod en daarop volgende afmijning worden gehouden van:

- het recht van erfpacht tot 19 november 2051 op een perceel domeingrond, groot 646 m2, gelegen te Mabon in het Vierde District van Aruba, (kadastrale indeling: 4-E-22), nader omschreven in **kadastrale meetbrief nummer 82 van vier juli negentienhonderd een en negentig**, met het daarop gebouwde, plaatselijk bekend als "**Mabon 9-F**".

Inzetprijs: Afl. 277.000, ==;

De veilcondities zullen 8 dagen voor de verkoopdatum ter inzage liggen ten kantore van voornoemde notaris.

De executant behoudt zich het recht voor, de veiling uit te stellen en op te houden zonder de verplichting de reden(en) daartoe te noemen.

Tot en met **20 mei 2026** kan onderhands op het te executeren registergoed worden geboden bij een aan voornoemde notaris mr M.J.C. Tromp gericht geschrift.

Bieders dienen terstond een bankgarantie of een gelijkwaardige document dat aanvaardbaar is voor de executant, te overleggen en in het bezit te zijn van een geldig identiteitsbewijs.

Notariskantoor mr M.J.C. Tromp
Santa Cruz 35
Tel: 5853500/5857900
Whatsapp: (297) 6997245
Fax: 5854222
Email: veiling@notaristromp.com / auction@notaristromp.com
Visit: Arubanotary.com



NoticiadiCorte

COMPANIANAN DI STEP BIKE NA HOTELNAN A CUMINSA CASO CONTRA GOBIERNO

ORANJESTAD – Awe mainta a tuma lugar den Corte di Husticia, caso sumario cu companianan di step E-Bike y Green Bike den e sector hotelero, a cuminsa contra Gobierno.

SOLO DI PUEBLO por a compronde cu e companianan ta cuestiona e decision di Gobierno cu ta perhudica nan. Di parti di Gobierno ta muestra cu e stepnan ta forma un peligro den trafico y cu ta usando tereno di Gobierno sin cu ta paga pa esaki.

CASO SUMARIO

E caso sumario ta relaciona cu e decision di Minister di Husticia pa kita tur e stepnan for di caminda ya cu esakinan ta forma un peligro pa trafico y esnan cu ta riba e step.

Un abogado di Bonaire, a representa e dos companianan mientras cu Gobierno a wordo representa pa hurista di Gobierno.

GOBIERNO A TUMA ACCION SIN NOTIFICA

Ta asina cu promer cu tratamiento di e caso, Hues a haci un serie di pregunta den direccion di Gobierno. Hues a puntra, pakico a tuma e decision aki. Di parti di Gobierno a wordo muestra cu e stepnan ta wordo poni riba caminda siendo cu nan no tin ningun permiso pa esaki. Pesey Gobierno a dicidi cu ta kita nan for di caminda publico.

Hues a puntra si Gobierno a notifica e companianan pa medio di un carta, un mail cu ta bay tuma medida contra e stepnan. E hurista di Gobierno a bisa Hues cu diferente biaha a haci anuncio publico di e medida pero no a manda notificacion na e companianan.

E hurista di Gobierno a bisa Hues cu door cu e companianan aki no ta paga belasting di number y esey ta haci cu Gobierno no sa kendenan ta doño. El a muestra cu e companianan tabata hiba maneho via one line, caminda clientenan tabata paga one line y coy un di e stepnan cu

ta staciona un caminda riba caya y ora caba di us'e ta lag'e staciona un caminda riba caya.

TABATIN PERMISO PERO A WORDO HALA ADEN

E abogado di e companianan a bisa Hues cu nan tabatin permiso y na dado momento esaki a wordo hala aden. Nan a bolbe pidi permiso pero no ta hayando contesta di Gobierno. Segun e abogado, nan ta operando for di 2017 y 2019 y na dado momento e permiso a wordo hala aden. For di 2022 nan no ta hayando contesta di Gobierno. Door di esaki, tin un debe entre 24 y 25 mil florin. E abogado a remarca cu nan no a haya ningun notificacion di Gobierno tocante e medida.

HOPI AÑA TA OPERANDO

El a splica cu e negoshi di step ta un forma di vehiculo mas sostenibel cu ta laga e turistanan move mas liher ariba e strip di e hotelnan. Segun e abogado door cu taxi ta sali caro y no ta tur ora tin taxi disponible, e step ta un forma cu e turistanan ta move mas liher. Un di e companianan ta existi desde 2017 y e otro desde 2019.

DECISION TA PERHUDICA COMPANIANAN

E abogado di e companianan a cuestiona e hecho cu un dia pa otro, Gobierno ta tuma un decision asina drastico. E companianan ta haya masha straño cu Gobierno ta bisa cu e no sa nada di e companianan. E abogado a cuestiona e hecho cu nunca antes Gobierno a tuma un accion contra nan y cu e decision aki ta perhudica e companianan. Esaki ta trece cune cu e companianan ta haya nan mes den problema financiero grandi, siendo cu tin un necesidad grandi pa e tipo di vehiculo aki den sector hotelero. A wordo muestra cu entre e dos companianan, nan tin 13 empleado y nan no sa a base di kico Gobierno a actua cu ta un situacion diferente compara cu e ultimo añanan. Na opinion di abogado, e tipo di step aki, no ta wordo menciona den ley. E companianan

ta haya cu Gobierno no a pone interes di tur partido hunto pa yega na un bon decision. Nan ta haya cu e seguridad di trafico no ta e motibo pa tuma un decision asina drastico. E abogado a pidi Hues pa declara e decision di Gobierno no admisibel.

STEPNAN TA FORMA PELIGER PA TRAFICO

E hurista di Gobierno a reacciona cu e tipo di vehiculo aki ta causa hopi accidente. Nan no ta aparece den ley y ta causa hopi daño y hasta morto. E hurista a muestra Hues potret con turistanan ta core pasa mey mey di auto, nan no ta bisti helm. El a muestra caminda ta mira un mama ta core cu su yiu riba step. E hurista a muestra cu tabatin lamentable caso cu morto door di e stepnan aki. Na opinion di e hurista, Gobierno ta haya cu tin un free for all caminda e turistanan cu step ta yega para unda cu nan kier, usando tereno di Gobierno sin cu nan tin permiso pa esaki y ta paga belasting. E hurista ta haya cu e companianan mes ta responsabel pa a haya nan mes den e situacion aki.

Hues a bisa cu e ta bay studia e caso y dia 22 Mei 2026 lo tin sentencia.

Clasificados










SOLODIPUEBLO@GMAIL.COM

CEL.585 9500



Na caminda pa Mundial

2026

EL AZTECA, E TEMPEL CAMINDA FUTBOL A IMPONE REGLA Y CONSAGRA FE DEN DIOSNAN TERENAL

Faltando apenas 34 dia pa e inicio di e Mundial 2026, Estadio Azteca ta prepara pa skirbi capitulonnan nobo den su historia rico. E Coloso di Santa Ursula, cu ta cumpli 60 aña dia 29 di mei proximo, ta keda e unico luga den historia cu lo a fungi como sede den tres diferente torneo mundialista.

E biaha aki, e stadion cu a mira Pele lanta e Copa Jules Rimet na 1970 y Diego Maradona corona su mes na 1986, no lo ta e escenario di e gran final. Sinembargo, e lo tin e honor di ta anfitrión di e apertura oficial dia 11 di juni, banda di tres partido di prome buelta, un di e diesseis y un di octavo final.

Un herencia di innovacion den futbol

El Azteca no ta simplemente un estructura di beton; e ta e luga caminda e reglanan moderno di futbol a haya vida.

Den e Mundial di 1970, pa prome biaha a introduci e uzo di carchi geel y cora, inspira p'e holoshi di trafico (semaforo) pa duna advertencia universal na e hungadonan. E prome carchi geel den historia a wordo duna netamente den e stadion aki na e hungador Kakhi Asatiani durante e partido inaugural entre Mexico y Union Sovietica.



Mesun cos a pasa cu e cambionan di hungado. Mexico 1970 a marca e debut di e sistema di substitucion, y El Azteca tabata testigo di e prome biaha cu un hungado a drenta pa reemplasa un otro den un competencia mundial.

Mas cu deporte: Un icono cultural

E stadion aki a inspira artista manera Andres Calamaro, kende den su cancion "Estadio Azteca" ta describi e sensacion di keda impresiona pa e "gigante" aki. Su

historia ta abarca hopi mas cu gol:

Religion y Musica: Na 1999, Papa Juan Pablo II a reuni mas di 100.000 fiel, mientras cu na 1993, Michael Jackson a atrae mey miyon di persona durante su gira "Dangerous World Tour".

Boxeo: E record di asistencia pa boxeo ta pertenece na e luga aki, caminda 132.000 fanatico a mira Julio Cesar Chavez derota Greg Haugen.

Partidonan historico: E "Partido di Siglo" entre Italia y Alemania Federal na 1970 tambe a tuma

luga riba e yerba aki, caminda Franz Beckenbauer a hunga cu su schouder disloca.

Renobacion pa e gran cita

Construi riba piedra volcanico y hasta cu un fossiel di mamoet descubri durante su construccion, El Azteca a pasa door di un proceso di renobacion acelera pa ta cla pa e Mundial 2026. Awo, cu un capacidad di 87.500 espectador, e stadion ta prepara pa su di tres inauguracion mundialista, wardando riba e momentonan cu pronto lo bira leyenda den e buki di historia di e deporte rey.

ULTIMO DESAROYONAN ROND DI HANTAVIRUS KICO NOS SA TE AWOR

ORANJESTAD, Aruba – 8 mei 2026: Directie Volksgezondheid (DVG) kier informa comunidad tocante e ultimo desaroyonan internacional relaciona cu e caso di hantavirus reporta abordo di e cruise ship MV Hondius.

A base di informacion oficial publica pa World Health Organization (WHO), autoridadnan europeo y otro institutonan di salud, e variante detecta ta e variante Andes virus, un tipo specifico di hantavirus cu ta wordo haya principalmente den Argentina y Chile. Importante pa comunidad sa cu Andes virus ta e unico variante cu cientificamente a demonstra capacidad limita pa transmiti di hende pa hende. Experto internacional ta enfatisa cu e tipo di transmision aki ta raro y generalmente ta rekeri contacto hopi cerca y prolonga. Y no ta comparabel cu COVID of Influenza.

Te awor, investigacionnan internacional ta sospecha cu e prome casonan posiblemente a contagia na Argentina prome cu nan a subi abordo di e barco. Segun reportenan internacional, tin indicacion cu e pareha Hulandes cu a presenta e prome sintomanan posiblemente a haci actividad di “birdwatching” den un area na Argentina. Argentina ta un di e paisnan den Suramerica

unda hantavirus ta aparece regularmente. E mayoria di casonan historicamente ta wordo reporta principalmente den regionnan sur y patagonico di Argentina, manera Patagonia, Neuquén, Río Negro, Chubut y Santa Cruz. E areanan aki ta mas rural y natural, unda contacto cu ratonnan silvestre infecta ta mas probable.

Autoridadnan argentino recientemente a reporta mas di 100 caso durante e ultimo periodo di vigilancia epidemiologico.

Actualmente, WHO, ECDC y CARPHA ta sigui considera e riesgo pa poblacion mundial como “abou” (“low risk”). E investigacion internacional ta continua y autoridadnan ta sigui monitorea pasaheronan y contacto cercano di personanan afecta.

DVG kier enfatisa cu pa Aruba no tin indicacion di menasa directo pa comunidad. E situacion ta wordo monitorea constantemente y Aruba ta sigui atento na tur actualisacionnan oficial di autoridadnan internacional di salud.

Den e mundo digital di awe, unda informacion ta circula rapidamente riba red social y otro plataformanan, ta bira cada biaha mas dificil pa distingui informacion corecto for di “fake news”, especulación of desinformacion. P’esey



Di unda e virus a bin?

Investigacionnan ta sospecha cu e contagio a pasa den areanan rural di Argentina prome cu e biahe abordo di MV Hondius a cuminsa.

E por pasa di hende pa hende?

Diferente na otro variantenan, e Andes virus tin capacidad pa transmiti entre hende, pero expertonan ta enfatisa cu esaki ta masha raro. Pa e virus pasa di un persona pa otro, generalmente ta rekeri un contacto hopi cerca y prolonga, manera entre parehanan.

Riesgo pa Aruba

World Health Organization (WHO) ta categorisa e riesgo pa e poblacion mundial como masha chikito. Pa nos isla, no tin ningun indicacion di menasa directo. DVG ta keda den contacto constante cu autoridadnan internacional y ta monitorea tur actualisacion pa garantisar seguridad di nos comunidad.



**HANTAVIRUS
PREGUNTA FRECUENTE**

¿Di unda e virus a bin?

Investigacionnan ta sospecha cu e contagio a pasa den areanan rural di Argentina prome cu e biahe abordo di MV Hondius a cuminsa.

¿E por pasa di hende pa hende?

Diferente na otro variantenan, e Andes virus tin capacidad pa transmiti entre hende, pero expertonan ta enfatisa cu esaki ta masha raro. Pa e virus pasa di un persona pa otro, generalmente ta rekeri un contacto hopi cerca y prolonga, manera entre parehanan.

Riesgo pa Aruba

World Health Organization (WHO) ta categorisa e riesgo pa e poblacion mundial como masha chikito. Pa nos isla, no tin ningun indicacion di menasa directo. DVG ta keda den contacto constante cu autoridadnan internacional y ta monitorea tur actualisacion pa garantisar seguridad di nos comunidad.

Bo Salud, nos prioridad!

DVG ta haci un yamado na comunidad pa semper sigui canalnan oficial y informacion confirma door di autoridadnan competente.

Directie Volksgezondheid lo continua informa comunidad debidamente

si tin cualkier desaroyo relevante pa salud publico di Aruba.

Bo Salud, Nos Prioridad

Pa mas informacion, like nos Facebook page Directie Volksgezondheid DVG Aruba, follow nos

riba Instagram [directie_volksgezondheid_aruba](#), sigui nos den WhatsApp Channel, ricibi tur informacion den Aruba Health App, bishita [www.dvg.aw](#), yama 5224200 of manda email na [servicio@dvg.aw](#)

EDUARD PIETERS TA CONFRONTA CRISIS DI SUSHI CU UN REALIDAD INCOMODO:

“ARUBA NO TA FALTA DI LEY, ARUBA TA FALTA DI HANDHAVING!”

Durante e reunion parlamentario, unda SERLIMAR a presenta su plan strategico, parlamentario Eduard Pieters di fraccion di PPA a trece un mensahe fuerte y directo: “E crisis di sushi na Aruba no ta solamente un problema tecnico of logistico, pero principalmente un problema di falta di handhaving, falta di responsabilidad y falta di liderazgo politico”.

Segun e cifranan presenta door di SERLIMAR, e compania estatal ta cubri entre 80% pa 90% di e recogemento di sushi domestico na Aruba. Pero a pesar di esey, realidad ta cu Aruba ta mas sushi cu nunca. “Nos no por sigui laga Aruba bira un pais, unda sushi ta domina caya, mondi y cura di hende,” Pieters a enfatisa.

Un sistema structural cu ta ehecuta regla

Un di e puntonan mas critico cu Pieters a pone riba mesa tabata e situacion actual, unda SERLIMAR lo por (despues di basta intento) yega na e punto di kita bari di e personanan cu no a paga nan contribucion. Segun Pieters, esaki ta crea un problema hopi mas grandi. “E pregunta cardinal ta: ora bo kita bari di sushi na un cas, unda nan ta tira nan sushi e ora?” el a cuestiona.

Pa fraccion di PPA, e contesta ta visibel den tur bario, den mondi, den cura di hende y riba tereno bandona. Esey ta contribui directamente na e problema di sushi ilegal cu Aruba ta enfrentando awor.

SERLIMAR no por carga e peso su so

Pieters a indica cu Parlamento mester tuma responsabilidad tambe. Segun Pieters, SERLIMAR tin e obligacion legal pa recoge sushi y contribui na maneho di desperdicio, pero e realidad ta cu e compania ainda no tin ful e capacidad, ni personal, ni presupuesto pa carga tur e responsabilidadnan cu gobierno ta pone riba nan schouder.

Algo increibel pero berdad ta cu actualmente, SERLIMAR un compania di Aruba ainda mester paga un tipping fee na e compania priva, pa procesa sushi riba tereno di pais Aruba. Pa Pieters, esaki ta un muestra, cu Aruba ainda no tin un sistema structural y sostenibel pa maneho di desperdicio.

“Tin ley caba. E pregunta no ta si tin ley. E pregunta ta pakico nos no ta ehecuta nan,” el a declara.

“Cancer di Aruba ta door di falta di handhaving”

Den un di e momentonan mas fuerte di e entrevista, Pieters a declara cu “e cancer di Aruba ta door di falta di handhaving.” Segun Pieters, hopi biaha gobierno ta evita tuma accion firme, pasobra niun hende kier bay duro riba comportacion irresponsabel di nos hendenan.

“No por ta normal cu un Prome Minister mester bay piki sushi manera frigidaire den bario, pasobra hende no kier sigui regla. Esaki no ta yuda pa cambia a titud ni situacion di sushi na Aruba” Pieters a bisa. Pa PPA, e tempo a yega pa aplica multa y sancion serio na esunnan cu conscientemente ta sushando Aruba.



E solucion real ta cambio di mentalidad

A pesar di su critica fuerte, Pieters a enfatisa cu e solucion riba largo plazo, no ta solamente represion, pero educacion. Segun Pieters, e cambio mester cuminsa for di scol y na cas.

“Mucha no por siña na scol pa cuida medio ambiente, mientras mayor ta habri porta di auto y tira boter pafor,” el a expresa.

Fraccion di PPA ta kere cu Aruba mester move na un cultura, unda separacion di sushi, reciclahe y responsabilidad civico ta bira algo normal, no excepcion.

“No tin sostenibilidad sin disciplina”

Pieters a conclui cu Aruba no por sigui papia di turismo sostenibel y calidad di bida, mientras e problema di sushi ta sigui ta for di control. Pa logra un Aruba limpi y sostenibel, gobierno mester stop cu discurso y show y finalmente

cuminsa muestra liderazgo, aplica ley cu autoridad, consistencia y vision.

“Un pais limpi no ta djis crea cu slogan. Ta crea cu disciplina, educacion y liderazgo cu no tin miedo di tuma decision,” el a conclui.

Clasificados

SOLODIPUEBLO@GMAIL.COM

CEL.585 9500

AHATA TA YUDANDO 100 SUPERVISOR REFORSA NAN HABILIDADNAN



ORANJESTAD, Aruba: 8 mei 2026 – Despues di e gran exito diun tayer exclusivo pa 3 aña consecutivo, AHATA ta bolbe ofrece un tayer di CHTA Education Foundation na su miembronan. Supervisor y gerente rond di Aruba ta participando pa reforsa nan habilidadnan di supervision.

Entrenamento intensivo di dos dia a ser prepara

specificamente pa 100 lidernan di ekipo pa participa e luna di mei aki. Entusiasmo pa siña y keda progresa na trabao ta notabel ya cu tur cupo a yena rapidamente.

Cu e programa practico y interactivo AHATA ta facilita sosten na supervisornan y nan gerentenan di un cantidad di compania, y ta duna oportunidad pa nan fortalece efectividad di

nan maneho y aumenta satisfaccion di nan ekipo y di cliente. E tayernan ta lidera pa Louise John y Suzanne Shillingford-Brooks di Talkabout & Earth Solutions, e facilitadonan di CHTA Education Foundation.

“AHATA tin como meta pa sigura desaroyo y crecimiento di nos forza laboral y sigura carera exitoso pa personanan cu ta contribui consistentemente na un

economia productivo. E ta un satisfaccion inmenso pa mira e interes pa e curso unico aki y e dedicacion dinamico durante e tayer.”, a comparti Presidente y CEO di AHATA, Tisa LaSorte.

AHATA ta aprecia e aliansa cu CHTAEF y e sosten di La Cabana Beach Resort y Eagle Aruba Resort pa comparti e gastonan di e programa.



“NOS NO POR LAGA BEROEPSONDERWIJS BIRA E YIU LUBIDA DI ARUBA” EDUARD PIETERS TA HACI UN YAMADA URGENTE PA E.O. INVERSION DEN EPB



Durante un bishita di trabou na EPB Hato, parlamentario Eduard Pieters di fraccion di PPA a laga un mensahe cla y contundente: Aruba no por sigui papia di desaroyo economico y crecimiento sostenibel, mientras e base practico di nos enseñansa ta laga atras.

Segun Pieters, e bishita no tabata solamente pa presencia e examen di Kokopleiding, pero pa mira cu su propio wowonan e realidad cu e docentenan y e studentenan di EPB ta enfrenta tur dia. “Ora bo cana den e scol y bo mira e condicionnan cu e docentenan ta traha aden, bo ta compronde cu tin un problema hopi mas grandi cu djis mantencion aki aya,” el a declara.

E docentenan ta haci milager cu poco recurso

Pieters a destaca cu, a pesar di e condicionnan dificil, e scol ta sigui produci resultado danki na e compromiso extraordinario di e docentenan. “Nos ta papia di hende cu ta traha cu amor, determinacion y energia, mientras nan ta haci milager cu recurso limita,” el a bisa.

Pero segun PPA, e dedicacion di e maestronan no por sigui wordo uza manera excusa, pa gobierno evita su responsabilidad. E edificio di EPB tin mas di 30 aña y segun Pieters, e deterioracion ya a pasa punto di “patch” y solucion temporal. E daknan ta yen di buraco, e infraestructura ta haci posibel cu e scol ta enfrenta gasto di coriente hopi halto.

“E momento pa reaccion y investigacion a pasa caba. Awor ta momento pa



inverti seriamente, prome cu algo grandi pasa y despues tur hende ta buska ken tin culpa,” Pieters a adverti.

Beroepsonderwijs no ta di dos categoria

Un di e criticanan mas fuerte di Pieters tabata riba loke e ta considera un abandono structural di beroepsonderwijs na Aruba. Segun Pieters, gobierno ta sigui trata e sector manera enseñansa general secundario, a pesar cu precisamente EPB y EPI ta forma gran parti di e profesionalnan cu Aruba su economia turistico ta depende riba dje cu ta existi mas inversion compara cu un enseñansa secundario general manera un mavo of havo/vwo.

“Nos no por sigui wak beroepsonderwijs manera e yiu lubida di nos sistema educativo, mientras Aruba ta grita pa chef, tecnico,

operador, artisanonan y personal practico califica,” el a enfatisa.

Pieters tambe a pone enfasis riba e falta di movimiento cu e ley di beroepsonderwijs, algo cu PPA ta considera esencial pa modernisa e sistema y duna EPB y EPI e structura cu nan mester pa funciona manera un beroepsonderwijs moderno.

Inverti den EPB ta inverti den futuro di Aruba

Durante su bishita, PPA a tuma nota tambe di e esfuerzonan interno cu direccion y e docentenan ta haci pa genera entrada y sostene cierto renobacion. Pero pa Pieters ta hopi cla, cu e tipo di inversion grandi cu EPB mester, no por cay riba scol of fundacion so.

“Si gobierno ta papia di surplus, e ora pueblo tin

derecho di mira unda e prioridadnan ta. Y enseñansa practico mester ta un di nan,” el a declara.

Segun Pieters, si e renobacion ta costa 7 of 8 miyon florin, Aruba mester mira esaki no manera gasto, pero manera inversion den capital humano y den futuro sostenibel di pais.

E mensahe final di Pieters di fraccion di PPA tabata directo: Aruba no por sigui laga EPB lucha su so. E scol ta yena cu potencial, cu e docentenan motiva y cu e hobennan cu kier progresa. Pero sin inversion serio, e sistema lo sigui deteriora. “Nos ta na un punto, unda gobierno mester scohe: sigui pone ‘band-aids’ riba problema, of finalmente haci e inversion cu futuro di Aruba merece,” Pieters a conclui.

MINISTERIO DI SALUBRIDAD, DVG Y PAHO TA PROMOVE COLABORACION PA REVALIDACION NA ARUBA



Workshop nacional y introduccion oficial di Comision Nacional ta marca siguiente paso den implementacion di Plan Strategico pa Revalidacion y Medionan di Apoyo

Directie Volksgezondheid (DVG), den colaboracion cu Organizacion Pan Americano di Salud (PAHO/WHO) y cu

apoyo di Ministerio di Salubridad, Asunto Social, Cuido di Adulto Mayor y Maneho di Adiccion, a organisa e workshop nacional “Strengthening Rehabilitation in Aruba: From Strategy to Action”. E encuentro a reuni stakeholders, profesionalnan di salud y partnernan strategico



pa avansa revalidacion y cuido cu medionan di apoyo na Aruba.

Durante e workshop, a presenta oficialmente e Comision Nacional cu lo guia e proceso di implementacion y coordinacion di e Plan Strategico pa Revalidacion y Medionan di Apoyo 2026–2030. Participantenan a intercambia conocimiento, dialoga riba prioridadnan y accionnan necesario pa mehora coordinacion di revalidacion na Aruba.

E Comision Nacional ta uni diferente actornan clave den sector di salubridad, incluyendo instancianan di salud, aseguronan medico, organisacionnan profesional y representantenan di personanan cu limitacion. Entre nan ta Directie Volksgezondheid (DVG), Uitvoeringsorgaan AZV (UOAZV), Dr. Horacio Oduber Hospitaal (HOH),

Vereniging Aruba (HAVA), Aruba Vereniging van Fysiotherapeuten (AVF), Aruba Association of Medical Specialists (ASHA) y Plataforma pa Personanan cu Limitacion (PPL). Cada organisacion lo nombra su representante den e structura di colaboracion. E iniciativa aki ta representa un paso importante pa mehora coordinacion y colaboracion den sector di salubridad.

Durante su discurso di apertura, Minister Mervin Wyatt-Ras a señala cu Aruba ta enfrenta un necesidad creciente pa servicio di revalidacion debi na envehecemento di e poblacion, aumento di malesanan cronico y impacto di condicionnan cu ta causa limitacion funcional. E Minister a enfatisa cu revalidacion mester wordo reconoci como un componente esencial di cobertura universal di salud y cu e ta

parti integral di tur nivel di cuido.

“Revalidacion no ta solamente cuido medico. Ta trata di independencia, participacion y calidad di bida. Cu e paso aki, Aruba ta sigui construi un sistema di cuido mas inclusivo, coordina y orienta riba e persona,” segun Minister Wyatt-Ras.

E workshop a conta cu contribucion di diferente experto y representantenan tecnico cu a facilita presentacionnan y discusionnan durante e programa. Entre nan tabata Uginia Thomson y Judelca Briceño di DVG, hunto cu Dr. Michelle Harris y Dr. Gustavo Pérez Reina di PAHO/WHO.

Den colaboracion cu PAHO/WHO, Aruba ta sigui traha pa un sistema di salud resiliente, inclusivo y sostenibel, unda acceso, calidad y coordinacion di cuido ta keda central.

E CARTA FANTASMA



Unda e carta a keda ?
Den cua laachi,
Ken tine scondi ?
Spirito no tine
Abo a mire ?
Nos a bolbe manda nan un recordatorio
Pa nan carta cu te ainda no a yega
Nan sa frega ohm !
Hunga kaki sconde
Nan ta mescos cu un belorio
Tapa cos bao tapijt
Sconde e krijt
Berdad lo sali na cla
Den un forma cla y raspa
Hospital no tin seriedad
Nan mesun calidad
Ta sigi bay atras
Nos no por confia den nan palabra, nos no
por a confia den nan servicio
Nan a neglisha patient
Nan no por hendel ni nan mes un oficina
Hefe riba hefe riba hefe
Cu no kier ta honesto

Ta kico tin na nan cabes
Ora un dokter di sala y un especialista ta
mucho druk
Laga e patient numa pa su cuenta cu
servicio di nursenan cu ta celebrando nan
siman cu amor pa prohimo e siman aki
Den e luna di Mei
Nan si por y nan si tey
Aunke nan tambe sa faya
E presion cu tin riba nan
Anto hospital ta busca un fusion cu
Insam ?
No no no shonnan
Esey no por!
No no no shonnan
Nan a demonstra cu nan no por hendel
mas
Pero kier bira baas ?
Insam ta bon manera e ta
Cu su desaroyonan positivo
Cu su hendenan profesional
Cu su hendenan special
Muestra bibo
Con bon Insam ta
Na nos pueblo dedica
Ni un carta hospital por skirbi y manda
nos manera priminti
Awor ta pueblo ta dicidi
INSAM ta di bo y di mi
Nos grandinan , nos hobennan y nos
muchanan
Cu mester di un trato y atencion medico
mayan
Danki Dios pa Insam
No ta pintura bunita so tin riba murayanan
den San Nicolas
No ta hotel Secrets of Restaurant Big
Mama
No ta Oniels Kitchen of Kulture Cafe so tin
San Nicolas ta completo cu su Insam !!
Un parti di Aruba bendiciona
Un parti di Aruba cu ta inspira !!!
Cu salud, alegria y sabiduria !!!

E Poeta Artista Lady Ruth



SER MAMA



E MAMA
Ta parse e solo resplandiente
cu su encanto semper presente

E MAMA
Ta manera e biento cu ta supla
dunando aire pa sinti con por bula.

E MAMA
Ta e luna cu ta duna claridad
formando bida cu Amor i felicidad

E MAMA
Ta e olanan bruto di lama
cu ta dirigi tempestad i trese calma

E MAMA
Ta e ramanan di e orquidia
cu ta trese beyesa cada bes cu e floria.

E MAMA
Ta e scuridad di anochi
cu ta ofrece seguridad den su scochi.
Pakiko maltrata e Muher sin mester
eta un luchadora cu ta cumpli cu deber.

DANKI NA DIOS PA A ESCOHE E MAMA
MARIA PA A TRESE SU YIU NA MUNDO PA NOS TA
LIBER.

Autor: Omaira I. Rodriguez-Britten

SOPÍ DI LETRANAN

ARBUSTO
BANCO
CARRETILLA
ESTANQUE
FLORES
FUENTE
INVERNADERO
MANGUERA
PALA
PARTERRE
PLANTAS
SETO
TIJERAS

Z	M	A	N	G	U	E	R	A	M	I	N	W	B
E	T	V	E	U	Q	N	A	T	S	E	Y	O	R
R	E	M	F	U	E	F	B	A	B	A	N	C	O
R	X	X	A	L	A	P	G	O	U	Q	A	D	R
E	O	R	E	D	A	N	R	E	V	N	I	E	N
T	C	A	R	R	E	T	I	L	L	A	O	C	K
R	W	J	X	W	O	S	S	E	R	O	L	F	W
A	K	V	D	S	A	T	A	T	H	W	T	Y	D
P	O	A	D	T	P	F	S	E	R	I	E	B	S
Y	O	T	N	W	U	V	Y	U	J	B	R	K	Z
P	T	A	E	E	Q	W	W	E	B	H	J	R	E
U	L	E	N	S	G	U	R	M	T	R	C	Z	R
P	A	T	Y	K	K	A	G	U	Q	Z	A	I	Z
P	E	X	B	B	S	P	T	R	C	I	G	D	V

SUDOKU

	7		6					
	9		5		3		1	7
				1				
	8						4	3
		2				6		
4	5						7	
				3				
7	4		2		5		6	
					4		2	

	3	8	5	7			9	
	6			1		5		7
	1		3		9		8	
6	9	3		4		7		
2		4			5		6	1
				8			4	9
8			4			9		
3					8	6	7	
5	7		1					4

			8		1			
						4	3	
5								
				7		8		
						1		
	2			3				
6							7	5
		3	4					
			2			6		

Oracion di dia

Un feliz dia bendiciona
yena cu gracia di Dios

”Lo Bo ta sacerdote pa semper na e mesun manera cu Melkisedec.”
(Hebreunan 7, 17b)

Ruman aki nos ta mira Hesus cu e titulo Sacerdote/Rey di Husticia pa
sempre, bunita titulo pa Hesus aunke Hesus no mester di ningun
introduccion of titulo paso E ta Dios y Dios ta Amor. Asina mes den
Hesus nos por experencia Amor, E Amor Unico cu nos tur ta anhela
consciente y inconscientemente nos tur ta anhela di experencia E Amor
di Dios.

Ta difcil pa esey sosode? Ta bon pa nos sa cu tur cos ta
depende di con habri nos curason ta pa Hesus y con nos ta permiti
Spirito Santo move den nos.
Diadomingo nos a scucha cu nos tin e
donnan y awor ta keda nos nada mas cu resa y pidi Spirito Santo habri
nos curason pa nos experencia y pone e donnan den practica y asina
acepta y cumpli cu Dios su boluntad den nos bida y nos biba!

Oracion:Hesus mare nos tur por reconece cu Abo ta nos Rey di Husticia
y acerca Bo curason misericordioso pa nos salvacion.
Amen

CAS BON TAEKWONDO CUP 2026

BrazilTaekwondoStichting ta organisa Cas Bon Taekwondo Cup na Honor di Master Augy Tromp. Cas Bon Taekwondo Cup ta e prome campeonato y clasificacion pa Ultimate Fighter November 2026 y Caribbean Qualifier 2027. Despues di 30 aña Ultimate Fighter ta bira e number nobo di Best of the Best.

Cas Bon Taekwondo Cup ta conta cu 2 referee Internacional for di exterior y un representante di Merca pa e Caribbean Qualifier di 2027 y nos atletanan local cu lo participa pa cualifica pa November 2026 y 2027.

Cas Bon Taekwondo Cup ta na honor di Master Augy Tromp kende tin 31 aña ta para referee na eventonan organisa pa Brazil Taekwondo Stichting. Desde di Sbarro Cup na aña 1995 te cu awe ainda y tambe na evento di 25 di April di Aruba Taekwondo Bond. Un personahe cu semper tey den eventonan



pa guia e peleanan di Taekwondo.

Diasabra dia 16 di Mei ta BrazilTaekwondoStichting su prome evento di aña 2026 Cas Bon Taekwondo Cup den Centro di Bario Brazil cuminsando pa 9'or di mainta cu forma sigui pa bringamento.

Brazil Taekwondo Stichting kier a invita un y tur pa bin presencia Cas Bon Taekwondo Cup cu nos atletanan den accion cu nan peleanan.

CAS BON

Taekwondo Cup

Qualifier pa e 1st Ultimate Fighter Cup 2026

Mei 16, 2026
Centro di Bario Brazil

Entrada
Mucha AWG. 10.00
Adulto AWG. 15.00

Honor na Master Augy Tromp
Referee Internacional.



CAS BON
Laga nos hiba Bo cas



Brazil
TAEKWONDO
STICHTING



Best Shot
By Klabér



PARADISE
BEACH VILLAS



ARU TKD
Aruba Taekwondo Association



Centro de Bario Brazil



ARUBA'S
MALTA
Balashi

 Paardenbaaistraat 10, Oranjestad, Aruba Tel.: (297) 525 - 7555 www.lottoaruba.com Resultado: Sorteo di Merdia - May 08, 2026		
 Sorteo # 4968 8487 6757 7854 MULTI-X FP BIG 4 Sorteo # 4968 6280 MULTI-X X2 OFF Sorteo # 3024 7083 ZODIAC Sorteo # 4968 4817 Tauro LUCKY 3 Sorteo # 1841 598 MULTI-X X2	 Sorteo # 0 x Jackpot 0 x Match 4+ 0 x Match 4 0 x Afl. 12,00 260.000,-  Sorteo # 0 x Jackpot 0 x Match 4 0 x Afl. 8,00 50.000,-  Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 400.000,-  Afl. 1.400.000,-  Sorteo #	Joker Letter Proximo Jackpot 260.000,- Proximo Jackpot 50.000,- Mega Ball Proximo Jackpot 400.000,- Afl. 1.400.000,- 

 Paardenbaaistraat 10, Oranjestad, Aruba Tel.: (297) 525 - 7555 www.lottoaruba.com Resultado: Sorteo di Anochi - May 08, 2026		
 Sorteo # 8841 9879 7077 9297 MULTI-X X2 BIG 4 Sorteo # 7885 1869 MULTI-X FP OFF Sorteo # 2590 1877 ZODIAC Sorteo # 6644 5697 Tauro LUCKY 3 Sorteo # 1574 281 MULTI-X X5	 Sorteo # 0 x Jackpot 0 x Match 4+ 0 x Match 4 0 x Afl. 12,00 260.000,-  Sorteo # 05-14-17-24-25 Proximo Jackpot 50.000,-  Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 400.000,-  Afl. 1.400.000,-  Sorteo #	Joker Letter Proximo Jackpot 260.000,- 05-14-17-24-25 Proximo Jackpot 50.000,- Mega Ball Proximo Jackpot 400.000,- Afl. 1.400.000,- 

ARUBA DOET 2026 TA HABRI OFICIALMENTE NA SEROE PATRISHI DIABIerna AWOR



E evento di boluntario mas grandi na Aruba, ARUBA DOET, lo tuma lugha e aña aki riba 15 y 16 di mei 2026. E evento anual aki ta invita tur hende na Aruba pa contribui door di participa den diferente proyecto cu ta sostene y mehora comunidad y e diferente organisacionnan. E aña aki, e apertura oficial di ARUBA DOET lo tuma lugha den bario di Seroe Patrishi, unda un grupo di estudiante di di dos aña di Universidad di Aruba ta organisa un proyecto special den colaboracion cu FCCA.

E apertura aki lo enfoca riba e tema central ‘colaboracion’, reflehando e bunita cooperacion entre Universidad di Aruba, FCCA y CEDE ARUBA. Pa medio di ARUBA DOET, cu ta un iniciativa di Oranje Fonds y ehecuta pa CEDE ARUBA, hopi colaboracion valioso ta sosode. E proyectonan di ARUBA DOET cu ta wordo organisa

tur aña pa e studiantenan den e diferente barionan di FCCA, ta un ehempel excelente di esaki.

Durante e apertura, lo conta cu presencia di e siguiente invitadonan special cu lo presenta un discurso cortico:

- Su Excelencia Alfonso Boekhoudt, Gobernador di Aruba;
- Sr. Daniel Tecklenborg, director di CEDE ARUBA;
- Sra. Julie Weber, directeur Technisch en Commerciële zaken di FCCA;
- Sra. Mieke de Droog, decaan di Faculty of Arts & Science di Universidad di Aruba.

E proyecto “Hunto pa Seroe Patrishi,” tin como meta mehora area di recreacion y involucra hubentud y residente di e comunidad. Durante dos dia, e boluntarionan lo participa den actividadnan



manera haci limpiesa, prepara superficie y pintura di cancha di futbol, basketball y e area rond. Un parti importante di e proyecto ta e pintamento di e logo diseña pa un hoben di e bario. Esaki ta pa fortalece e sentimiento di identidad y orguyo den e bario.

E proyecto ta conta cu apoyo di boluntario di The St. Regis Aruba Resort den colaboracion cu The Ritz-Carlton Aruba y tambe otro boluntario. Na mes momento, ta anima

residente pa participa durante e dianan di ehecucion di e proyecto. Yamada na comunidad ARUBA DOET ta subraya e importancia di traha hunto pa fortalece nos comunidad y e impacto positivo cu boluntarismo tin riba nos isla. E diabierna y diasabra venidero, lo tin un total di 135 proyecto tumando lugha rond di henter e isla, for di Noord te cu San Nicolas, na diferente fundacion, scol, scouting y clubnan deportivo. Actualmente, no tur proyecto tin suficiente

boluntario ainda pa sigura cu cada iniciativa ta un exito rotundo. P’esey ta haci un yamada special na e pueblo di Aruba pa duna un man. Tur hende ta bon bini pa participa y haci un diferencia durante ARUBA DOET.

Por inscribi ainda via e website oficial: www.arubadoet.com.

Ban DOET!

CEDE ARUBA
Beatrixstraat 8 582 7666
567 8119 arubadoet@cedearuba.org www.arubadoet.com